

Prädisch zom Valentinsdag 6. Sunndag em Johreskries
14. 2. 2010

Leeu Lücksche, leeu Christemingsche!

A) Einladung an Zint Valentin

Hück han ich eener eenjelaade,
der sull he selver von sich schwade.
Als ühren eenfachen Dorfpastor,
stell ich üch he nen Bischof vor.
Singe Name dun hück vill Lück, besonders Verliebte nenne,
ov se met Schokoladehätze ov met Blömche erömrenne.
Ihr ahnt et schon Zint Valentin,
dä rof ich hück für üch hin.
Als Bichof levv hä vür mieh als siebzehnhundert Johren,
als de Christemingsche mietzendeels noch verfolgt woren.
Wie de Maulwürf em Verborjene unger de Äd,
han de Christe domols ihr Mission jemäht.
Et wor jo verbodde sich als Chris ze bekenne,
mer sollt nur dä Kaiser als Herrjott nenne.
Doch von Terni dä Bischof Valentin,
dä nohm dat nit esu eenfach hin.
Dat hät em zwar et Levve jekoss,
ävver si Andenke es bis hück net verrost.
Hä sull et üch selver verzelle,
dot en üch röhig jetz he vürstelle.
Ich denk ihr sitt hück zur Fantasie bereit,
weil dat die jehürt zur Fasteloovendszeit.

B) Zint Valentin verzällt us singem Levve

Ich bin nit dä hillije Fall nit hin,
wozo se mich mahten dä Valentin.
En Deutschland han se immer wieder versuch,
mich vor allem anzerofe jäjen de Fallsuch.

Ävver dat muß ene andere Vallentin sin,
dä jemeent is als Fall nit hin.
Ich kumme – un dat verjess ich nie,
us däm italienische Städtche Terni.
Do kohme se zo mir ens jeloofe,
un han mich zom Bischof beroofe.
Domols wor ne Bischof ne eenfache Mann,
an dä kohm jeneen janz eenfach eran.
Do wor nix mit staatse Praach, un Bohei
Mir wore ärm ävver mir wore och frei.
Jo, dat wore domals hadde Zigge,
mir Christe hatten vill ze ligge.
Ävver uns jing et öm dä Herrjott nur,
in unserem Här Jesus singer Spur.
Für mich dreht et sich nur um Joddes Leev,
die mir immer vun allem dat Wechtijste bleev.
Mich hott die Freud am Jlöve erjriffe.
Dat hätt mich zo dä Mingsche jedrivve.
Un dann soh ich do Zaldate, met Heiratsverbot.
Dat wor für de Junge wirklich en große Not.
Un och de Mädche, die se jähn hotte,
vür Schmätz un Drur krieche moote.
Ich han domols mänchmol Jedichte jeschrevve.
Dat es och dä Zaldate nit verborje jeblevve.
Die Junge finge och an ze schrieve un ze dichte,
an ihr Mädche üvver ihr eijene Liebesjeschichte.
Ihr Hätze jinge op vür Liev,
wat natürlich net verborjen bliev.
Do han ich op däm Herrjot sei Sakrament jebaut
Un han se heimlich als Mann un Frau jetraut.
Us däm Jaden, hinger mingem Huus,
holt ich inne och noch dä Brutstruß.
Denn die Blömche, die dunn verzelle,
dat de Leev deht et Levve erhelle.

Dröm es dat esu jekumme ze üch als Brauch,
dat mer sich schenk an mengem Fess Blömche auch
Wat ich hot met Leevende jemaach,
wood däm Kaiser bald hingerbraach.
Dä wult keen verhierodete Kreeglück han,
sondern wollt als Zal dat nur ne leddige Mann.
Drom hollt mer mich von dä Leevende fott,
un brenk mich eenfach en et Kachott.
Bevür se mich ene Kopp kleener jemaht,
han se mich an de Kett jelaht.
Mer verzellt, däm Aufseher si Kind,
dat kunnt nix sin, dat wor blind.
Dat Mäde kom nu bei uns in et Kachott,
un säht et jlööv och an unseren Herrjott.
Do han ich em de Häng opjelaat.
Un süch et wor jesund jemaach.
Et hät mer deev en de Ooge jeluht
Un ich han sing Hätz kloppe jehurt.
Em dunkele Kachott wor et op eemol hell,
Mir verlevvten uns och op dä Stell.
Ich sin üch op esu enem Bekenntnis erschreke,
sin üch koppschöddelnd de Ooge huh trecke.
Dat sich ne Bischof verlieb, wor nit verbodde,
weil dat mer domols noch keene Zölibat hodde
Ävver mir han do keen lange Freud dran jehatt
Weil dat se mich han bahl schon ömjebraht.
Minge letze Breef, su verzellt die Lejend,
dä offen un ihrlich ming Leev bekennt.
Do schreev ich op et Papier hin:
„In ewijer Liebe, Dein Valentin!“
Esu bin ich jeblivve bis hück
dä Patron vun de Liebeslück.
Wenn mäncher erklärt mich och zum Floristepatron,
zum Praline- un Schokoladehellige schon,

für mich dreht et sich nur um Joddes Leev,
die mir immer vun allem dat Wechtijste bleev.

C) Et lohnt sich, sich öm de Leev ze surje

Dröm ben ich hück vom Himmel jeklumme,
bin och jähn heher no Netzem jekumme.

Ich sin dat ihr met Leev fiert Karneval,
dröm hätt ihr se hück he net all,

weil dat hück mancher Mann un manche Frau
sich präparieren muß noch zur Narrenschau.

Ävver ejal op hück ze Fasteloovend,
ov an nem anderen Morjen oder Ovend,
mir nix als üch ze erinnere üvverig bliev,
an die große Bedeutung vun der Leev.

Wenn mäncheen weed vernevelt et Jeheen,
mit Jold, Jeld un Richtum ze scheffele jän,
lott ihr üch dat röhig ens jesat sin,
dat all is verjänglich, jeht dohin.

Däm Mingsch es wirklich jet jelunge,
der he en de Welt de Leev jefunge.

Leev hät dem Mingsche Sinn jejevve,
Leev överduhrt sunar uns Ädelevve.

Weil dat dä Herrjott voll Leev uns jähn hät
Hä sich öm uns kümmere Mingsche surje deht,
esu solle mir uns och kümmere öm de Leev,
surje, dat die bei uns am Leev bliev.

Mir Mingsche drage Joddes Jesech,
mir sin dem leeven Herrjott jleech.

Dröm wirpe mir uns Leev nit fott,
wie ahl Klamotte en dä Sammelpott.

Weil dat Leev uns mem Herrjott verbindt,
jedeneen de Leev esu jroßartig find.

Mir wisse wo uns Leevswuzzele sin,
die jonn janz sicher zum Herrjott hin.

Dovon hät Jeremja schon jesunge,
dat uns Wuzzele mem Herrjott verbunge.
Wie ene staatse Bohm de sing am Wasserbach,
hann mir uns Wuzzele beem Herrjot fassjemaach.
Mir wulle net bei die jehüre,
die middse en de Wüste spüre,
wie Einsamkeit un Üvvermoot,
deht uns Mingsche janitt jood.
Mir Mingsche sin keene Wöstestruch em Wind,
dä ohne Wuzzele keeine Halt mieh find.
Dröm jevv ich üch noch janz schnell dä Rot,
dat ihr stets op de Leevende aachte moht.
Denn och bei Üch blöht noch so mancherlei.
Do es bestimp och janz vill Leev dobei.
Doht üvver ühr Mädche un ühr Fetze
net bloß lästere, heesche un hetze.
Un wenn ihr zwei beim Knutsche seht,
ihr dat als Leeveszeeche versteht.
Un dann zeeg durch Beispill dä junge Löck,
dat Treue un Leev führt wirklich zom Jlöck.
Sillich pries Jesus net die, die alles besetze,
ävver die Leevende, die se verfolge un verletze.
Sillich pries Jesus, die Hunger han no Jerechtikeet un Leev,
die für jedenen, och für die Ärme, üvverig bleev.
Sillich sin die, die han bejriffe un erfahre,
dat de Leev alles andere als en Billigware.
Op de Leev verzichte möch ich niemols drop,
och wenn se mich jekoss et Levve und ä Kopp.
De Leev, dat es e Himmelsjeschenk,
ich hoff, dat ihr immer dodran denk.
Leev steck janz deev em Jläuve drin.
Dodran erinner ich üch Ühre Valentin.
Blievt bei der Leev in singem Namen,
sag ich hück nur un schleß met Amen.